



Elecciones Estatales Payares 2011

Lo primero ye valorar el calter esceicional d'esta convocatoria eleitoral, qu'hebio se ser adelantada y que vieno fundamente marcada pola crisis económica "internacional" y el bipartidismu, cola alternancia PSOE-PP nel gobiernu español. Ello asina, atalantamos que los análisis al respeutu resultaríen tan complexos como ineficaces a la hora de valorar estes elecciones en clave nacional.

Situación previa

A la escontra, el puntu de partía tien de ser necesariamente la situación xenerada n'Asturies de magar les postreres elecciones nacionales, de mayu d'esti añu, onde les opciones asturianas presentes non solo tornaron a acupar un espaciu marxinal nel panorama políticu asturianu sinon que nel casu d'URAS-PAS o el Bloque-UNA, los oxetivos marcaos quedaron tan descomanadamente lloñe de los resultaos algamaos que se xeneró un marcu nueu al que tendrán d'afayase y que los condiciona pa próximas convocatories eleitorales. (Ver valoración d'Elecciones Nacionales y de Conceyu 2011)

Nel casu d'Andecha Astur, qu'apostó por Conceyu Abiertu como marcu ampliu al traviés del qu'algamar la xunida d'ación, vista la imposibilidad d'avanzar mínimamente n'alcuerdos col restu de formaciones polítiques asturianas, la situación nun camudó un res coles elecciones nacionales, aparte de confirmar l'acierto táuticu de Conceyu Abiertu y les sos posibilidaes de futuru frente al inmovilismu partidista.

Arriendes d'ello, la irrupción de Foro por Asturias nel panorama políticu asturianu, acupando col so mensaxe lo que fasta entós fuere l'espaciu asturianista, y l'asitiamientu d'IU na oposición, y per ende en situación de caltener la coherencia programática al nun tener acesu a les avezaes "compensaciones" pola so participación nel gobiernu del "Principado" col PSOE, modificaren fundamente la situación política asturiana.



Elecciones estatales

Nesi contestu, la convocatoria d'Elecciones estatales debiera tener servíu pa facer un apueste por algamar esa xunidá d'aición eleutoral ente les formaciones polítiques asturianas y ver d'afitar un espaciu propiu de magar el que dir llimando aspereres y ufiertando a la sociedá asturiana una alternativa eleutoralmente viable. Llamentablemente los llamaos fechos por Andecha Astur nesi sen (Dii de la Nación Asturiana) nun atoparon el menor ecu, dexando erma esa posibilidá dende un entamu.

Arriendes d'ello, la nua llexislación eleutoral española qu'obligaba, escontra tou xaciu democráticu, a algamar un mínimu del 0,1% de firmes del eleutoráu, suponía una torga pa la presentación de les formaciones polítiques asturianas que veníen de carecer un auténticu descalabru eleutoral, y en tantu que Conceyu Abiertu definió'l so espaciu d'actuación exclusivamente a nivel de conceyu y nacional, a lo menos mentes toviere na presente fas d'acumulación de fuerces y d'encadarmamientu organizativu, cabía seriamente la posibilidá de que l'espaciu políticu asturianu quedare ensin acupar, tresmitiendo una imaxe de debilidad extrema ensin precedentes.

Oxetivos, valoración y análisis de la situación pos-eleutoral

Ye nesa situación na qu'Andecha Astur asumió la responsabilidad de presentase a estes eleiciones, y féxolo con oxetivos mui concretos:

- Amosar la capacidá del nacionalismu asturianu pa superar les torgues impuestes pol Estáu español pa presentase a estes eleiciones.
- Caltener la presencia de la opción nacional asturiana nestes eleiciones.
- Avanzar na normalización llingüística.

Nesi sen, la valoración d'estes eleiciones tien de ser en tantu a los oxetivos marcaos y ye nidio que s'algamaren perriba de les propies espeutatives darréu que:

- Superóse ampliamente y ensin mayor dificultá la peñera de les 1.000 firmes.



- Caltúvose una presencia considerable na campaña eleitoral, amosando una vuelta más la capacidá d'organización y militancia d'Andecha Astur.
- Consiguióse otru avance na normalización llingüística al algamar que se dieren por válidos tolos documentos presentaos en llingua asturiana y que la mesma Xunta Eleitoral provincial ratificare per escrito la validez de les papeletes en llingua asturiana.

Por embargu, y pesia superar ampliamente los oxetivos colos que mos presentemos a estes eleiciones, l'análís nun pue ser positivu porque una vuelta más quedó n'evidencia'l calter marxinal del nacionalismu asturianu, y la falta d'un mínimu de comunicación ente les formaciones polítiques asturianas cara a avanzar en procesos de xunidá d'aición que dean puxu a un espaciu políticu propiu y a la so rentabilización eleitoral.

Ye nidio que los resultaos eleitorales demuesen la existencia d'un espaciu eleitoral propiu pal nacionalismu d'izquierda y el caltenimientu del compromisu por un sector de la sociedad asturiana que nun se dexa influenciar poles situaciones polítiques esternes, calteniéndose na coherencia y na llucha.

Pero con afitar el so munchu valir y la garantía de futuru qu'ello representa, hai de reconocer que resulta insuficiente de toes toes si bramente queremos condicionar de dalguna mena'l panorama políticu asturianu.

Pa enriba, l'escenariu restante a nivel nacional determinará la "re-asturianización" de les propuestas de Foro, una vuelta fracasáu'l so intentu de "reconquista" de la drecha española, y l'ascensu d'IU que por primer vegada dende hai munchu tiempu nun va quedar n'evidencia por hipotecar les sos propuestas programátiques polo beneficios a algamar por participar nel gobiernu col PSOE, y de xuru resucitará'l so componente asturianista, defendiendo la oficialidá, el mediu ambiente, la democracia participativo... agora que yá nun tienen posibilidaes polítiques de llevalo alantre.

Ello asina, lo mesmo que pasó nestes eleiciones estatales nes que la mayor parte del votu "asturianu" foi recuperáu por IU y el Foro por Asturias, quedaría por ver si dellos seutores fasta hai vien pocu próximos a IU (mesmamente el Bloque por Asturias que tuvo coaligáu con ella y formó parte del gobiernu del "Principado" fasta unos meses enantes de les eleiciones nacionales) tornen de nueu al espaciu d'izquierda española autonomista, o si bien prefieren apostar pola xunidá d'aición na esquierda soberanista y que los restos del



votu URAS-PAS se vuelquen dientru Foro por Asturias o si se descuelguen definitivamente de les postures más rexonalistes y redefinen el so proyeutu averandose tamién más al soberanismu d'izquierda.

Alternatives de futuru

A la fin, y comu concluxón d'esti análisis, Andecha Astur perafítase na necesidá d'enartar un espaciu políticu asturianu, lo más ámpliu y respetuosu posible pa con toles formaciones y sensibilidaes polítiques, que marque una distancia col autonomismu españolista, y que ponga n'evidencia la precariedá de la nuesa supervivencia comu Pueblu, frutu del desigual enfrentamientu ente los intereses del Estáu español y d'Asturies, y del xabaz procesu d'asimilación nacional y de falta de llibertaes democrátiques que carecemos con esi oxetu.

Ello asina, Andecha Astur reitera la so dimposición permanente a participar en toes y caúna de les propuestas que puean dase cara a la xunidá d'aición de presones y formaciones, perafitando nel equí y agora, el so compromisu con Conceyu Abiertu, non solo porque la esperiencia asina lo avala, sinon en tantu supón la única iniciativa xunitaria fasta agora esistente.

D'otra miente, y dientru la necesidá refería de xenerar espacios políticos propios, Andecha Astur camienta qu'independientemente de los deseyables procesos de xunidá d'aición nos que se compromete a participar, faise tamién imprescindible redefinir y afondar nel conceutu de Movimientu de Lliberación Nacional comu espeutativa de futuru nel algame d'una Asturies llibre, independiente y socialista.

En Xixón a 15 d'avientu de 2011